

FESTIVAL DI DANDE DEDICA NA "DIDI" WERNET

ORANJESTAD(AAN)E di 23 festival di Dande awe noch den Club Caiquetio ta dedica e aña aki na Hendrik "Didi" Wernet.

Por corda ainda cu na 1982 el a wordo corona como Rey di Dande den Connie Francis Club.

Didi ta yiu di e conocido y gran cantante di dande di pasado Hendrik Wernet q.e.p.d. y vda. Pedra Wernet. E tin dos ruman, Rudy y Magda y ta casa cu Lientje Trimon di Tanki Leendert unda "e mucha di Sero Blanco", manera el a

yega di wordo yama canñosamente ta residencia. Didi su tata Hendrik tabata entre e mihor cantantenan di dande di San Nicolas y tabata un di e defensornan di Dande. Na edad joven Didi a uni cu e grupo di su tata te cu su tata a haya confianza



den dje y lague toca cu e grupo y finalmente a bira cantante di dande y ta entre e "grandinan di dande" mescos cu e ta conta entre e "grandinan di tumba" y ta baladista y salsero cu a goza di exito cu diferente agrupacion musical di nos isla.

Semper tambe cu su afamado "timbal" den man.

Den dande participando 13 aña caba el a logra ademas di e titulomaximo tambe diferente clasificacion y dos vez terminando na di dos

lugar.

Ademas di su presentacionnan riba escenario e tabata sindicalista di UEA, forma parti di varios comision di gobierno y actualmente ta masha activo den ASOMA tratando di solucionna problemanan cu presencia pa e miembronan.

Riba e portretnan por mira Didi durante un di su presentacionnan, cu su trofeo di segundo lugar na 1987 y hunto cu su familia.